



Caderno da crítica

Cuestionario Proust: Antía Otero

[Ramón Nicolás](#) 12 de Febreiro de 2014

<https://cadernodacritica.wordpress.com/2014/02/12/cuestionario-proust-antia-otero/>

1.– Principal trazo do seu carácter?

– A intuición

2.– Que calidade aprecia máis nas persoas?

– A xenerosidade.

3.– Que agarda das súas amizades?

– Sinceridade e xenerosidade..., mais tamén sei que ás veces agardar o mellor dos demais é arrogante.

4.– A súa principal eiva?

– A elevada autoesixencia.

5.– A súa ocupación favorita?

– Ler e escribir.

6.– O seu ideal de felicidade?

– Non creo nos estados ideais en canto á felicidade. Creo máis en sacarlle o zume a aqueles polos que transitamos, aínda sendo moito máis difíciles.

7.– Cal sería a súa maior desgraza?

– Non ter nada polo que ilusionarme e ninguén con quen compartir as ilusións.

8.– Que lle gustaría ser?

– A mellor versión de min mesma.

9.– En que país desexaría vivir?

– No mesmo no que vivo. Con moitos cambios, iso si.

10.– A súa cor favorita?

– Tódolos azuis.

11. – A flor que máis lle gusta?

– Esas primeiras rosas do ano que me regala a miña avoa Rosalía e que ten na súa horta.

12.– O paxaro que prefire?

– O cuco cando teño a sorte de escoitalo.

13.– A súa devoción na prosa?

– A devoción é algo que se vai alimentando e repártese pouco a pouco entre libro e libro. A miña é moi variada. Dende David Foster Wallace, Boris Vian ou Unica Zürn ata Samuel Solleiro e Marcos Calveiro.

14.– E na poesía?

– Dende Baudelaire a Sharon Olds, Xela Arias e Ana Romaní.

15.- Un libro?

– Aquel que aparece cando máis o preciso.

16.– Un heroe de ficción?

– Sempre fun máis dos antiheroes

17.– Unha heroína?

– Pentesilea.

18.– A súa música favorita?

– A que trata de non repetir e colócase na vertixe.

19.– Na pintura?

– A que sae do marco e expándese.

20.– Un heroe ou heroína na vida real?

– A miña avoa e o meu avó... (se virades todo o que fan e como afrontan a vida coa idade que teñen... entenderíadelo).

21.– O seu nome favorito?

– O que vai ter a miña filla.

22.– Que hábito alleo non soporta?

– A prepotencia

23.– O que máis odia?

– Os prexuízos e o patriarcado.

24.– A figura histórica que máis despreza?

– Os ditadores, os que se reencarnan en ditadores e os que soñan con selo.

25.– Un feito militar que admire?

– Militar?... Ningún.

26.– Que don natural lle gustaría ter?

– Creo máis no traballo continuo que nos don(s).

27.– De que maneira lle gustaría morrer?

– Na casa. Durmindo e sen enteirarme de nada, despois de cear con moita fame, beber con moita sede e rir con moitas ganas.

28.– Cal é o seu estado de ánimo máis habitual?

– Fun aprendendo a abandonar a melancolía e acollerme aos estados creativos.

29.– Que defectos lle inspiran máis indulxencia?

– Os que non teñen mal fondo.

30.– Un lema na súa vida?

– Anque estou completamente en contra da caza, gústame o significado deste: “Non gastes pólvora fina en pardais”.